

14 OCT 2003

PARLIMEN-EKONOMI

PRESTASI EKONOMI NEGARA MENDAPAT PENGIKTIRAFAN ANTARABANGSA

KUALA LUMPUR, 14 Okt (Bernama) -- Rakyat harus berbangga dengan prestasi ekonomi negara yang berterusan mendapat pengiktirafan antarabangsa hasil langkah bijak kerajaan merangsang pertumbuhan ekonomi, kata Menteri Kewangan Kedua Datuk Dr Jamaludin Jarjis hari ini.

Beliau berkata, minggu lepas agensi penarafan antarabangsa Standard & Poor telah menaikkan gred penarafan ekonomi Malaysia kepada 'A-' berbanding 'BBB+' sebelum ini.

"Ini berita baik untuk rakyat Malaysia ketika negara sedang menjadi tuan rumah OIC, dunia mengiktiraf ekonomi negara sebagai telah benar-benar pulih," katanya kepada pemberita di lobi Parlimen di sini.

Beliau menjelaskan jawapannya kepada soalan Datuk Wan Junaidi Tuanku Jaafar (BN-Batang Lupar) di dalam Dewan Rakyat, yang ingin tahu sama ada dasar fiskal negara telah berjaya menjana pembangunan ekonomi dan kemakmuran rakyat.

Jamaludin berkata, pemulihan ekonomi adalah berkat pakej ekonomi dan Bajet 2004 yang diumumkan Perdana Menteri Datuk Seri Dr Mahathir Mohamad baru-baru ini.

Kedudukan ekonomi negara yang baik turut ditunjuk dengan prestasi memberangsangkan Bursa Saham Kuala Lumpur (BSKL) apabila Indeks Komposit (IK) telah melonjak hingga mencecah paras 800 mata berbanding sekitar 600 sebelum ini, katanya.

Jumaat lepas, IK mencecah sebentar paras 800 mata, mencatat 800.72 mata dalam dagangan awal. --BERNAMA

HM HM AHM